



IZMJENE I DOPUNE PROCEDURE ZA RAD PREDŠKOLSKIH USTANOVA **- vodič za unapređenje sigurnosti u vrtićima -**

Na osnovu aktuelne epidemiološke situacije, novih zaključaka štabova/stožera civilne zaštite u različitim oblastima, te referirajući se na sve prethodne preporuke i smjernice Svjetske zdravstvene organizacije, Federalnog ministarstva zdravstva, Zavoda za javno zdravstvo FBiH, Hrvatskog zavoda za javno zdravstvo, te Instituta za zdravlje i sigurnost hrane Zenica, pripremljene su izmjene i dopune procedure za rad predškolskih ustanova. Preporuke su namijenjene zaposlenicima predškolskih ustanova, roditeljima i djeci. Upute se prilagođavaju aktuelnoj epidemiološkoj situaciji. Ove preporuke i upute ne isključuju provođenje drugih preporuka shodno aktuelnoj i promijenjenoj epidemiološkoj situaciji.

ORGANIZACIJA RADA S DJECOM. Boravak u vrtićima preporučuje se organizovati uključivanjem približno između 15 i 20 djece po odgojno-obrazovnoj skupini, što ne znači da je 20 djece maksimalan broj po skupini. Pa ipak, treba težiti koliko god je moguće što manjem broju djece u jednoj skupini. Kod većih skupina djece treba razmotriti mogućnost organizovanja rada u odgovarajućoj prostoriji veće površine i visine, kao i mogućnost razdvajanja djece u dvije skupine ili osnivanje nove skupine. Treba pokušavati održati koliko god je moguće uvijek istu djecu i odgajateljice u skupini.

ORGANIZACIJA PROSTORA. Prostorija treba da bude što veće površine i visine, prozračena i osunčana dnevnim svjetlom, odvojena od prostorija u kojima borave druge skupine djece. Potrebno je da se prostorija može provjetriti vanjskim zrakom.

SAVJETI ZA RODITELJE. Roditelji/startelji dovode i odvođe djecu u vrtić na način da ne ulaze u ustanovu osim u krajnjoj nuždi, već dolaze do ulaza pri čemu zadržavaju distancu od najmanje dva metra u odnosu na druge roditelje/staratelje i djecu. Dijete odgajatelj preuzima ili prepušta roditelju/staratelju ispred ulaza u ustanovu, primjereno dobi djeteta, održavajući distancu. Svaki roditelj treba pojačati održavanje higijene u vlastitom domaćinstvu.

MJERENJE TEMPERATURE. Preporuka je da svaki dan prije dolaska u vrtić roditelj u djetetovu bilježnicu upiše vrijednost izmjerene temperature kod djeteta kod kuće. Bilježnicu dijete donosi sa sobom u ustanovu, a odgajateljica svakodnevno provjerava. U slučaju povišene tjelesne temperature roditelji ne smiju dovoditi dijete u ustanovu već se javljaju telefonom ustanovi i izabranom pedijatru/ljekaru porodične/obiteljske medicine radi odluke o testiranju i liječenju djeteta. Ako djeca razviju simptome Covid-19 infekcije tokom boravka u ustanovi, odgajatelji odmah obavještavaju roditelje, koji u najkraćem mogućem roku moraju doći po dijete. Svi uposlenici imaju obavezu mjeriti tjelesnu temperaturu svaki dan prije dolaska na posao, te da u slučaju povećane tjelesne temperature ne dolaze na posao, već se javljaju telefonom poslodavcu i svom ljekaru. Preporučuje se mjerenje tjelesne temperatura bezkontaktnim toplomjerom svim zaposlenicima, svakodnevno kod dolaska i odlaska s posla, te da se utvrđuje imaju li respiratornih simptoma ili drugih znakova zaraznih bolesti. Preporučuje se voditi evidenciju o izmjerenim temperaturama uposlenika. Sa povišenom temperaturom, kašljom, otežanim disanjem i drugim simptomima zarazne bolesti nije dozvoljeno raditi, brinuti se o djeci, niti dolaziti u prostor poslodavca, odnosno ustanove. Ako zaposlenik razvije simptome u toku radnog vremena, treba što prije da obavijesti nadređenog, napusti radno mjesto, te se obrati ljekaru. Zbog mogućnosti ovakvih slučajeva neophodno je da postoji organizirana zamjena za zaposlenike.

Pratite isključivo preporuke koje izdaju nadležne zdravstvene institucije i ustanove na području BiH, FBiH i ZDK. Kako biti kontuirano informisan:

- Informacije o aktualnoj epidemiološkoj situaciji i preporukama na području BiH, FBiH i ZDK možete pronaći na internet stranicama Instituta za zdravlje i sigurnost hrane Zenica (<https://inz.ba/>), kao i Federalnog ministarstva zdravstva (www.fmoh.gov.ba) i Zavoda za javno zdravstvo FBiH (www.zzjzfbih.ba);
- Najnovije informacije SZO o područjima širenja Covid-19 dostupne su na: <https://www.who.int/emergencies/diseases/novel-coronavirus-2019/situation-reports/>, a upute SZO o Covid-19 na: <https://www.who.int/emergencies/diseases/novel-coronavirus-2019>.

Panika nije opcija, oprez jeste! Vaš INZ